

VISCHNANCAS DA MUNTOGNA

In onn da success

L'Associaziun Padrinadi svizzer per vischnancas da muntogna ha gì in onn da success. En il nov magazin «Bergwelten hautnah» vegn tranter auter er purtreda la Val Medel.

GIUSEP CAPAUL/FMR

Per l'Associaziun Padrinadi svizzer en favur da vischnancas da muntogna, l'uschenumnada «Patenschaft Berggemeinden», è il 2022 stà in onn da success, avend pudì sustegnair divers gronds projects. Grazia a fauturs e fauturas han ins pudì sustegnair divers projects infrastrutturals cun radund 20 milliuns francs. Uschia ha il Padrinadi dà l'onn passà 870 000 francs per projects sco rempars e distanzas a Bondo II e per la nova punt sur la Bondasca ord il fondo sco era in sustegn pli grond per la scolina e scola a Samedan.

Sco quai ch'il president dal Padrinadi svizzer per vischnancas da muntogna, anteriur cusseglier dals chantuns *Werner Luginbühl* scriva en la brochura dal Padrinadi «Bergwelten hautnah», tom 17, è il dumber da vischnancas en las muntognas fitg grond. Quatter dad ellas – mintgamai ina ord in'otra regiun linguistica – vegnan preschentadas.

Tranteren sa chatta era la Val Medel sut il titel vair ed encurschant: «Ina vallada che na dat betg si». Mintga vischnanca, resp. vallada allegada ha sia atgna topografia, istorgia ed atgnadads. La multifariadad da la pitschna Svizra è gronda. L'appel sa cloma perquai: «Guardai che quai restia uschia e che la populaziun da las muntognas sentia era ch'ella na saja betg persula.»

Il Padrinadi svizzer per las vischnancas da muntogna rimna e reparta onn per onn considerabels meds finanzials. El pussibilitescha uschia effizientamain solidaritad tranter las muntognas e la bassa cun qua tras era rinforzar la coesiun naziunala.

MARIASTEIN

Martin Candinas viseta Mariastein

Sin invitaziun digl avat da Mariastein, *Peter von Sury*, e dils conventuals, ha *Martin Candinas* visitau en sia funcziun sco president dil Cussegl naziunal officialmein il liug da pelegrinadi Mariastein el nord il cantun da Soluturn. El ha fatg quei la gievgia dils 20 d'avrel cun accompagnament d'ina saltera dils survetschs dil parlament. Numerusas persunas dalla veta publica han retschert il president, aschia era las presidentas dil parlament cantunala da Soluturn, *Susanna Koch Hauser* (carschida si a Trin) e *Lucia Mikeler-Knaack* da Basilea-Campagna, dil president *Bülent Peker* da Basilea-Marcu e dalla cussegliera naziunala *Elisabeth Schneider-Schneiter*, habitonta da Biel-Benken, in vlg vischinont da Mariastein.

En siu plaid ella Basilica da Mariastein ha Candinas numnuar quater raschuns che hagian motivau el da vegnir a Mariastein. Primo sia relaziun cun ils benedictins entras la claustra da Mustér, secundo la regiun dil Schwarzublenland cun cunfins intercantunals fetg vischins e tals naziunals cun la Frontscha e la Tiaratudestga. Quella situaziun geografica pretendi in modus da viver che seigi drizzaus viers il brat, il scomi ed il dialog. In'atgnadad semeglionta al Grischun. Terzo hagi el relaziuns personalas cun il cantun da Soluturn, seigi sia consorta gie carschida si a Luterbach ed il dialect local «siu paun da mintga di». Finalmein ha Candinas era ofniua sia relaziun personala cun *Mariano Tschuor*, che meina dapi il schaner 2019 il project «Viado el mund – Mariastein 2025», in'interpresa ch'emproma d'organisar e estructurar il futur da quei liug da pelegrinadi, che vegn frequentaus onn per onn da ver 250'000 persunas. (cdm/fmr)



Avat Peter von Sury, Martin Candinas, Nathalie Radelfinger, saltera dil parlament, e Mariano Tschuor. FOTOCRISTIAN HILZINGER



Rolf Marugg undrescha la lavur prestada dal revisur Erhard Danuser. FOTOS MAD



La buna preschentaziun dal café Badilatti pudess inspirar bainqual apicultur per aschurnar la reclama per ses mel.

Ils apiculturs grischuns a Zuoz

L'Uniun dals apiculturs grischuns ha la fin dal mars salvà sia radunanza a Zuoz. In dals puncts che è vegnì discutà: l'apicultura daventa, per consequenza da la midada climatica, adina pli complexa.

Il president da l'Uniun dals apiculturs engiadinais, *Jachen Puorger*, ha dastgà beneventar 30 delegadas e delegads da las uniuns diversas uniuns affiliadas a la radunanza da la fin da mars a Zuoz. L'uniun engiadinaisa dals apiculturs è vegnida fundada l'onn 1904. Ella è la pli gronda sezziun en il chantun tant perturgant intschess sco er areguard ils commembers. Il territori s'extenda passa 100 km da Samignun enfin a Malögia. Dals 118 commembers èn 90 apiculturs activs che tegnan var 1000 pievels. Lur center cuminaivel sa chatta a Zernez. Là vegnan salvadas sedutas e diversas occurrenzias sco er purschids curs da basa e da perfeziunament per rumantsch e tudestg. Quels èn bain frequentads.

Las inspirativas etichettas dal café

Il president communal da Zuoz, *Lucian Schucan*, ha referi davart l'istorgia locala, menziunond en spezial l'influenza da la famiglia dominanta dals Planta che ha er fundà il Plantahof. El ha punctuà la muntada da las filialas dals divers manaschis industrials grischuns a Zuoz, dal Lyceum Alpinum e da la brassaria dal café Badilatti sco impurtants employaders al lieu. Visitond quella èn las apiculturas ed ils apiculturs vegnids a savair bleras infurmaziuns perturgant brassar café, ch'igl ha dà da sagiar. Las explicaziuns davart produziun e commercialisaziun dal café cun etichettas novas èn sta-



Igls dus sfinxs da la chavazza da morts che Gabi Morhart ha scuvert en ses avieuler a Tartar. Sura quel propolisà e sutvart igl viv. FOTO GABI MORHART

das instructivas ed han inspirà bainqual apicultur, co optimar sia vendita dal mel. Igl è vegnì allegà, ch'i creschia perfin kiwis e ivas sin la costa sulegliva da Zuoz, ma il café vegnia importà e derivia da cultivaziun controllada.

La midada climatica e «giasts» dal sid

Rolf Marugg, igl parsura da l'Associaziun dals apiculturs grischuns, ha manà la radunanza cun inschign. En ils rapports annuals da tut

ils resorts èn vegnidas tematisadas tut las activitads, surtut la scolaziun e l'adattaziun a las cundiziuns actualas. Igl è vegnì punctuà dad *Andrea Müller*, manader dal ressort tratga, che la sanadad e la buna selezziun dals pievels saja il fundament dal progress, constatond ch'i saja da dominar adin'enavant novas sfidas e l'apicultura daventia perquai adina pli complexa, er sco consequenza da la midada climatica. En quest connex ha constatà *Gabi Morhart* da Tartar, ch'i saja d'observar ils ultims onns adina dapli «giasts» da regiuns meridiunals. Ella ha pudì preschentar dus sfinxs da la chavazza da morts creschids (Totenkopfschwärmer) che saja entrads en ses avieuler – apparentamain tolerads dals avieuls – ed hajan maglià mel, senza chaschunar ulteriurs donnas.

«Di dal cader» e referat public

Anne Casutt ha preschenta las finanzas da l'associaziun. *Erhard Danuser* ha demissionà sco revisur suenter lunga activitad. Sia lavur è vegnida reconuschida da la radunanza. Da nov surprena *Andreas Pfister* quest uffez. Ils 18 da november vegn ad avair lieu il «Di dal cader» en il Plantahof a Landquart. En quell'ocasiun vegni puspè a dar in referat public.

Las delegadas e delegads èn turnads a chasa satisfatgs da la dieta da Zuoz cun bun café en la valischa. (cdm/bt)

PRO RAETIA

La Pro Raetia a la tschertga

Malgrà la proposta da schliar l'uniun – datti fermas vuschs per cuntinuar cun la Pro Raetia.

GIUSEP CAPAUL/FMR

Igl è enconuschent che la suprastanza da la Pro Raetia ha decidì da proponer 2024 da schliar la Pro Raetia. La maioritad dals suprastants, includ il president, vegnan a cuntinuar a la testa da la Pro Raetia be per l'accompagnar sin la dissoluziun proponida. Per il cas ch'i vegniss decidì da cuntinuar fissi d'eleger tant in nov president sco la suprastanza.

Hedi Luck-Fasciati, che fa part dapi 2005 da la suprastanza, è dentant fitg persuerter da cuntinuar. Ella declera en il gist cumpari «Fegl da comunicaziun da la Pro Raetia» ses arguments persuerter. Motiv principal: Ina uniun cun 309 commembers na pon ni astgan ins betg schliar.

Reto Fetz è per cuntinuar

Balz Fetz (1914-1993), da Domat a Basilea, ha fundà 1949 la Pro Raetia. Quella è stada ditg l'organisaziun tetgala da las numerusas uniuns grischunas en la Bassa, per uschè da dir «l'ambassadura dal Grischun». La Pro Raetia era adina ina part da la revista «Terra Grischuna». Da quella è *Reto Fetz*, figl dal fundatur, stà blers onns editur. In temp ha el era gì l'incarica da



Quant ditg datti anc l'uniun ch'è vegnida fundada l'onn 1949? FOTOS MAD

mainagestiun da la Pro Raetia e fatg part da la suprastanza. El, ch'è pia collià en plirs regards stretgmain cun la Pro Raetia, stess, sco el scriva, fitg mal, sche quella vegniss schliada.

La Pro Raetia ha sustegnì blers onns las uniuns grischunas en la Bassa, ch'eran per ils commembers ina part patria ordaifer il chantun. Deploablmain ha la mobilitad odierna e l'abundanza dad uniuns gì per consequenza che be paucas uniuns grischunas ella Bassa existan anc e vegnan era a svanir dal tut. Era il dumber da commembers è i enavos drasticamain ils davos onns. Autras raschuns èn l'auta vegliadetgna da

numerus commembers e che bleras vischnancas fusiunadas u firmas èn crudadas ord il commembradi.

2024 po la Pro Raetia festivar ses giubileum da 75 onns. Per Reto Fetz, in commember fitg persvadi ed engaschà, è gist quest giubileum ina buna chaschun da tschertgar cun ina nova crew autras vias per l'avegnir.

La proxima radunanza da commembers è ils 13 da matg en il hotel Stern a Cuir.